

Ang Unang Abyador

KATUYOAN: Pagpahimangno sa dili matinoohon ug pagpaandam sa mga luwas alang sa paglalain (*Rapture*).

Unsa man ang imong nagustohan nga paagi sa pagpanaw? Kadaghanan sa mga katawhan karon gusto nga sa kahanginan sila kon mobiyaha. Gusto ba ikaw nga mopanaw sa kahanginan bisan ug dili mosakay sa eroplano? Dihay usa ka tawo sa *Daang Tugon* nga naglakaw sa *DALAN SA KINABUHI* nga mipanaw sa kahanginan nga walay sakyanan.

Human gipatay ni Cain si Abel, gihatagan sa Dios si Eva ug lain nga anak ug iyang gitawag sa ngalan nga Seth. Tungod kay ang Dios nagsaad ug Manluluwas gikinahanglan nga adunay diosnon nga kaliwatan diin anha siya magagikan. Sa nanglabay ang mga katuigan, ang katawhan misanay ug ang kadautan usab mitubo. Ang tagsa-tagsa kinahanglan magapili sa dalan nga iyang pagaagian. Ang kadaghanan nanagpili sa dalan nga *daw matarung* ug diyutay lamang ang mipili sa dalan sa pagtoo.

Ang mga katawhan midangat sa tag-as kaayo nga pangidaron. Atong basahon ang mga kasaysayan sa mga pangidaron sa uban nga mga kaliwatan ni Seth. Genesis 5:6-32. Ang labing tugulang mao si Mathusalem nga nakadangat ug 969 ka tuig. Genesis 5:27. Kini nga tawhana anak ni Henoch (Enoch) nga maoy atong gitawag ang unang abyador.

Inyo ba nga namatikdan samtang atong gibasa ang kasaysayan sa tagsa-tagsa ka tawo? Gawas sa usa ka tawo ang ilang kinabuhi natapus sa tulo ka mga pulong: *Ug namatay siya*. Ngano man? Tungod kay ang bayad sa sala mao ang kamatayon. Mobati ba kita sa kalipay kon makakita ug prosesyon sa minatay? Karon atong mahibaloan ang paagi sa pagbuntog sa kahadtok sa kamatayon ug moabut ang panahon nga ang uban kanato dili na moagi sa kamatayon.

Susiha kon unsa ang gisulti mahitungod kang Henoch. "Siya naglakaw uban sa Dios." Genesis 5:24. Si Henoch may pakig-uban sa Dios kay naglakaw siya sa pagtoo. Nagakahulog kana nga gidala niya ang mga halad nga gikinahanglan sa Dios. Ang duha dili magaka sa paglakaw gawas kon sila magakauyon. Amos 3:3. Busa tataw kaayo nga ang pagtoo ni Henoch nakapahimuot gayud sa Dios.

Si Henoch nagawali ug nagapamatuod bisan asa siya mopaingon. Judas 14,15. Ang mga katawhan nangahimo nga dili diosnon. Nanaglakaw sila sa ilang kaugalingon nga dalan, nanagdayeg sa mga kahibulongan nga mga buhat sa tawo apan nanagmulo batok sa Dios. Si Henoch nagpahimangno kanila nga ang Ginoo dili na madugay moabut apan sila nanagpasipala og sulti sa mga gipamulong niya.

Usa ka adlaw samtang si Henoch nagalakaw nga may pangidaron ug 365 ka tuig, kalit lamang siya nga nahanaw. Tungod sa pagtoo si Henoch gilalin ngadto sa langit. Hebreohanon 11:5,6.

Dili nato masabtan kon giunsa si Henoch pagbalhin kay sa kalit gilalin man siya sa Dios ngadto sa langit. Ug ang labing maanindot niini nga sugilanon mao nga kita makapaniguro kon unsa ang manghitabo sa mga magtotoo niining panahona sa Grasya. And Dios nagpamatuod pinaagi sa pagpadayag diha kang Apostol Pablo. Nagpasidaan siya nga moabut ang adlaw nga ang Ginoong Jesu-Cristo magpakita sa kapanganuran, ug adunay mga tingog sa trumpeta, mangabili ang mga lubnganan, ug ang mga nangamatay nga mga magtotoo mamangon.

Ug kita nga maabtan nga mga buhi pa, sa usa ka pagpamilok mosugat sa Ginoo sa kapanganuran. 1Tesalonica 4:13-17. Gihulagway ang paglaum sa mga magtotoo dinhi sa hulagway nga gitawag **SAKYANAN SA KALUWASAN**.

Gitawag kini ni Apostol Pablo nga atong *Bulahan nga Paglaum*. Tito 2:13. Dili na angay kahadlokan ang kamatayon kon aduna na kita niini nga paglaum. Matuod gayud ang ginaingon sa uban, "Ako nagapaabut sa pagbalik sa Ginoo." Dili na angay nga maguol alang sa mga nangamatay kay kon sila tinuod man gayud nga naluwas, lalinon man kita uban kanila sa kapanganuran. Busa gusto sa Dios nga kita magamantala samtang nagapaabut sa Iyang paglalin kanato. Gusto Niya nga pahimangnoan ang matag-usa mahitungod sa kinabuhing walay katapusan nga anaa kang Cristo.

Human ang mga magtotoo kuhaon niining kalibutana adunay makalilisang nga panahon sa paghukom nga moabut. Hunahunaa unsa ka masulob-on kon ikaw atua na sa itaas apan ang imong pamilya nagaantus. Imo na ba silang gipahibalo nga si Cristo namatay tungod sa ilang sala? Hunahunaa unsa ka makauulaw atubangan sa Dios kon nagahimo kita sa mga butang nga wala makapahimuot kaniya sa takna nga tawgon na kita sa pag-atubang Niya. Kinahanglan magakinabuhi kita sa katarung ug sa kaputli sa tanang panahon.

Sa sunod nga pagtulon-an ato na usab nga mahibaloan ang makalilisang nga paghukom nga miabut sa kalibutan human sa paglalin ni Henoch. Siguroa gayud nga ikaw makasakay sa SAKYANAN SA KALUWASAN kon si Cristo mabalik aron mahauban ikaw sa paglalin ngadto sa itaas sa pagpuyo uban kaniya.

SAG-ULOHON : 1 Mga Taga-Tesalonica 4:17. Ug kita nga mga buhi pa nga mahabilin, pagasakgawon ngadto sa mga panganud uban kanila sa pagsugat sa Ginoo diha sa kahanginan; ug sa ingon niini kita magapaki-uban na sa Ginoo sa tanang panahon.

PAGTULON-AN 3 - PAGATUBAGON

Badlisi ang husto nga pulong o grupo sa mga pulong aron sa pagkompleto sa mga mosunod nga mga pangutana sa ubos:

1. Si Adam miabut sa panuigon nga : a) 100 b) 530 c) 930 ka tuig. Genesis 5:5
2. Si Mathusalem miabut sa panuigon nga : a) 559 b) 969 c) 150 ka tuig. Genesis 5:27
3. Ang amahan ni Mathusalem mao : si a) Noe b) Henoch c) Moises. Genesis 5:21
4. Si Henoch naglakaw uban sa Ginoo og usa ka adlaw: a) siya namatay ug miadto sa langit b) siya mikayab sa langit nga wala moagi sa kamatayon. Mga Hebreohanon 11:5
5. Si Pablo nagpahibalo sa mga taga Tesalonica nga : a) ang tanan dili makasinati ug kamatayon b) ang uban dili makasinati ug kamatayon. c) ang tanan mangamatay. 1 Mga Taga-Tesalonica 4:16,17
6. Gitawag kini ni Pablo nga : a) butang nga angay kalisangan b) bulahan nga paglaum. Tito 2:13
7. Makasiguro kita nga makauban sa Ginoo sa iyang pagbalik kon : a) kita maayo nga tawo kon magaampo kita sa tanang adlaw b) kon kita metoo nga si Jesus namatay ug nabankaw ug maoy atong Manluluwas. 1 Mga Taga-Tesalonica 4:14
8. Atong sugaton ang Ginoo : a) dinhi sa yuta b) diha sa bukid c) diha sa kapanganurah. 1 Mga Taga-Tesalonica 4:17
9. Ilista sa ubos ang mga butang nga dili nimo gusto buhaton inigbalik ni Cristo ug sa pikas ang mga butang nga gusto nimo nga buhaton inigbalik sa Ginoo.

Dili nako gusto nga buhaton:	Gusto nako nga buhaton:
a)	
b)	
c)	
d)	
10. Isulat nga sinag-ulo ang 1 Mga Taga-Tesalonica 4:17 _____

